

आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 गुरुवार

दिनांक 30.05.2024

प्रमुख समाचार –

- 1— बेमेतरा के स्पेशल ब्लॉस्ट फैक्ट्री म होय विस्फोट के मामला म पुलिस ह कंपनी के पदाधिकारी अवधेश जैन अउ आने लोगन के खिलाफ एफ.आई.आर. करीन दर्ज।
- 2— भीषण गर्मी ल देखत हुए राज्य शासन डहार ले आयोजित करे जात प्रदेश स्तर के समर कैम्प ल रोक दे गेहे।
- 3— दक्षिण-पश्चिम मानसून आज केरल पहुंच गेहे।

बारूद फैक्ट्री-एफआईआर

बेमेतरा जिला के स्पेशल ब्लॉस्ट फैक्ट्री म होय विस्फोट के मामला म पुलिस ह कंपनी के पदाधिकारी अवधेश जैन अउ आने लोगन के खिलाफ एफ.आई.आर. दर्ज कर लेहे। जानबा के मुताबिक विस्फोटक सामग्री के रखरखाव म चूक अउ सुरक्षा मानक म कमी ल लेके अपराध पंजीबद्ध करे गेहे।

जानबा के मुताबिक पाछु पच्चीस मई के बेमेतरा के बोरसी स्थित बारूद फैक्ट्री म विस्फोट होय ले एक मजदूर के मउत होगे रिहीस। फेर, आठ आने मजदूर अभी भी लापता हे।

अमृतकाल छत्तीसगढ़ विजन

“अमृतकाल छत्तीसगढ़ विजन-दू हजार सैंतालीस” डॉक्यूमेंट तैयार करे बर काली नवा रईपुर के राज्य नीति आयोग के सभाकक्ष म वर्किंग ग्रुप के अधिकारी मनके बइठका होइस। बइठका म वर्किंग समिति ह “गुणवत्तपूर्ण स्वास्थ्य और पोषण” बिसय म आधारित लघु, मध्यम अउ दीर्घकालिक लक्ष्य म सुझाव दीन। बइठका म पावर पॉइंट प्रेजेंटेशन के जरिया ले स्वास्थ्य अउ परिवार कल्याण विभाग के संग महिला अउ बाल विकास विभाग के अधिकारी मन ह अपन विभाग के लक्ष्य, चुनौती अउ सामर्थ्य के जानकारी दीन। बइठका म राज्य म मृत्युदर कम करे, एनीमिया मुक्त करे, केन्द्र सरकार के योजना ले लाभ पाय, ट्रेनिंग संस्था मनके गुणवत्ता सुधारे, रिसर्च संस्थान म जोर, टीकाकरण, मेडिकल टूरिज्म हब बनाय के संग आने जरूरी बिसय म घलो चर्चा करे गीस।

पूर्व सरपंच-हत्या कोशिश

बिलासपुर जिला के बीजा गांव के कोटवार ह जमीन विवाद ल लेके पूर्व महिला सरपंच के उपर ट्रैक्टर चढ़ाके उंखर हत्या करे के कोसिस करीस। ए महिला बालका कोल गांव के सरपंच रिहीस। गंभीर हालत म महिला ल बिलासपुर रिफर करे गेहे। ए घटना ले आक्रोशित लोगन मन ह तखतपुर थाना के घेराव करीन, जेखर बाद पुलिस ह कोटवार उपर हत्या के कोसिस करे के मामला दर्ज कर लेहे। उहें, चार आने लोगन मनके खिलाफ घलो एफआईआर दर्ज कर ले गेहे।

कैदी फरार-प्रहरी निलंबित

केन्द्रीय जेल अंबिकापुर म बंद एक कैदी के तबीयत खराब होय के कारण मेडिकल कॉलेज अस्पताल रेफर करे गे रिहीस। ए दउरान ओला एम्बुलेंस म केन्द्रीय जेल ले मेडिकल कॉलेज अस्पताल ले जाय जात रिहीस, उही समय रद्दा म ए कैदी एम्बुलेंस ले कूदके भाग गीस। जेल प्रहरी मन ह ए मामला के पुलिस म

सिकायत दर्ज करा देहे। उहे, जेल अधीक्षक ह दूनों प्रहरी मन ल लापरवाही बरते म तत्काल प्रभाव ले निलंबित कर देहे।

ठगी

भिलाई म क्रिप्टोकॉरेंसी अउ शेयर बाजार म निवेश के झांसा देके दू लोगन मनले करीब पौने दू करोड़ रुपिया के ठगी के मामला सामने आय हे। जानबा के मुताबिक चंदू लाल चंद्राकर मेडिकल कॉलेज म आई डिपार्टमेंट के एचओडी डॉक्टर लिपी चक्रवर्ती ह क्रिप्टोकॉरेंसी म निवेश के नाम म अंदावन लाख रुपिया गंवा दिस। उहे, बीएसपी के सेवानिवृत्त अधिकारी प्रलेश शांति बशु ले शेयर बाजार म निवेश के नाम म एक करोड़ छब्बीस लाख रुपिया के ठगी कर ले गीस।

बताय जात हे, कि दूनों मामला म ठग मन ह लिंक भेज के एप डाऊनलोड करवाइस। अउ ए एप के जरिया ले उंखर मन ले ठगी करीस। ठगी के एहसास होय म दूनों पीड़ित मन ह अलग-अलग थाना म सिकायत दर्ज कराइन।

उहे, जशपुर पुलिस ह प्रधानमंत्री आवास योजना के नाम म एक लाख चौंतीस हजार रुपिया के ठगी करइया दू फरार साइबर ठग ल गिरफ्तार करे हे। ए आरोपी मन ह पीएम आवास के नाम म धोखा ले बायोमैट्रिक फिंगर मसीन म अंगूठा लगाके लोगन मन ले लाखों के ठगी करे रिहीन।

हिन्दी पत्रकारिता दिवस

आज हिन्दी पत्रकारिता दिवस हे। हिन्दी पत्रकारिता के यात्रा तीस मई अट्ठारह सौ छब्बीस के पंडित जुगल किशोर शुक्ल डहार ले सुरु करे गे पहिली हिन्दी समाचार पत्र “उदन्त मार्तण्ड” के प्रकासन ले सुरु होइस। ए दिन सच्चाई अउ साहस के संग जनकल्याण के उद्देश्य से काम करइया हिन्दी पत्रकार मनके बिसेस योगदान ल समर्पित हे। ए समाचार पत्र ले भारत म पत्रकारिता के एक नवा युग सुरु होइस।

जवान-मौत

जैसलमेर म पदस्थ सीमा सुरक्षा बल-बीएसएफ के एक जवान सेवक राम कोराम के ड्यूटी के दउरान तबीयत बिगड़े ले मउत होगे हे। ए जवान धमतरी जिला के गांव बरबांधा के रहवइया रिहीस। जवान के तबीयत बिगड़े म ओला दिल्ली के एक अस्पताल म भर्ती कराय गे रिहीस, जिहां उंखर मउत होगे। काली ए जवान के पार्थिव सरीर ल उंखर गांव बरबांधा लाय गीस, जिहां पूरा राजकीय सम्मान के संग उंखर अंतिम संस्कार करे गीस। जवान ल श्रद्धांजलि दे बर क्षेत्र के विधायक के संग गांव के लोगन बड़ संख्या म मौजूद रिहीन। सेवक राम कोराम करीब छब्बीस साल ले बीएसएफ म अपन सेवा देवत रिहीस।

हत्या

धमतरी जिला म संपत्ति विवाद ल लेके दू आने-आने मामला म दू लोगन मन ह अपन-अपन पिता के हत्या कर दीन। पहिली मामला कुरुद थाना क्षेत्र के सिवनीकला गांव के हे, जिहां भागीरथी पटेल ह पुलिस ल बतईस कि उंखर पिता फिरंता पटेल के उंखर बड़े भाई पूनमचंद पटेल ह अपन तीन आने साथी मन संग मिलके हत्या कर दीन। उहे, दूसर मामला कुरुद के ही बकली गांव के हे, जिहां दीनानाथ देवांगन ह घलो पुलिस म सिकायत करीन कि उंखर पिता पंचराम देवांगन के उंखर भाई सुदामा देवांगन ह अपन दू साथी संग मिलके हत्या कर दीन। दूनों मामला म पुलिस ह चार आरोपी मन ल गिरफ्तार कर लेहे।

उहे, इही जिला के केरेगांव म चाय पीये बर रूके पिकअप चालक उपर मोटरसायकल सवार तीन लोगन मन ह धारदार हथियार ले हमला करके उंखर हत्या कर दीन। पुलिस फरार आरोपी मन ल ढूंढत हे।

चोरी-आरोपी गिरफ्तार

जांजगीर-चांपा जिला के बलौदा पुलिस ह जर्वे गांव स्थित छत्तीसगढ़ राज्य ग्रामीण बैंक म चोरी करे के मामला म तीन आरोपी मन ल गिरफ्तार करके न्यायिक हिरासत म जेल भेज देहे। पुलिस ह आरोपी मन तीर ले ताला काटे के औजार, सेंसर मसीन अउ मोटरसाइकिल जब्त करे हे। पुलिस के अनुसार आरोपी मन ह बैंक के कैश वाल्ट ल काटे के कोसिस करे रिहीन। ए घटना पच्चीस-छब्बीस मई के रात के हरय, जिहां आरोपी मन ह सीसीटीवी के केबल काट के बैंक के दरवाजा के ताला तोड़े रिहीस अउ सेंसर मसीन ल चोरी कर ले रिहीस।

मौसम

दक्षिण-पश्चिम मानसून आज केरल पहुंच गेहे अउ पूर्वोत्तर के जादातर हिस्सा म आगू बाढ़त हे। मौसम विभाग के महानिदेशक मृत्युंजय महापात्र ह आकाशवाणी समाचार ल बतईन कि मानसून निर्धारित दिनांक एक जून ले दू दिन पहिली ही आ गेहे।

ऐति, छत्तीसगढ़ म भीषण गर्मी के दौर जारी हे। आज प्रदेश के अधिकतम तापमान रायपुर जिला म पैंतालीस दशमलव सात डिग्री सेल्सियस रिहीस। उहें, बिलासपुर म अधिकतम तापमान पैंतालीस दशमलव दू अउ कोरबा म पैंतालीस दशमलव एक डिग्री सेल्सियस दर्ज करे गीस।

इही बीच, मौसम विभाग ह काली प्रदेश के रायपुर, दुर्ग, बिलासपुर, राजनांदगांव, जांजगीर-चांपा, कोरबा, बलौदाबाजार-भाटापारा, महासमुंद के संग सत्रह जिला म लू चले के संभावना जतईन। उहें, काली उत्तर अउ दक्षिण छत्तीसगढ़ के एक-दू जघा म हल्का बरसा होय या गरज-चमक के संग छीटा पड़े के संभावना हे।

भीषण गर्मी ल देखत हुए राज्य शासन डहार ले आयोजित करे जात प्रदेश स्तर के समर कैम्प ल रोक दे गेहे।

मैत्रीबाग-वन्यजीव सिंप्रकलर

भिलाई इस्पात संयंत्र के मैत्रीबाग चिड़ियाघर म वन्यजीव मन ल गर्मी ले बचाय बर बिसेस व्यवस्था करे गेहे। एखर तहत बंदर अउ पक्षी मन बर पानी छिड़काव के व्यवस्था करे गेहे अउ सांभर अउ हिरण के बाड़ा म फव्वारा के बेवस्था करे गेहे। उहें, बाघ मन बर कृत्रिम वाटरफॉल तैयार करे गेहे। एखर अलावा जानवर मनके पिंजरा ल धूप ले बचाय बर चारों डहार ले हरा नेट लगाय गेहे।

उद्यानिकी विभाग के उप महाप्रबंधक अउ मैत्री बाग प्रभारी डॉक्टर नवीन कुमार जैन ह बतईन कि चिड़िया घर के वन्यप्राणी मनके लू ले सुरक्षा बर वातावरण ल ठंडा रखे जात हे। खुला म रहवइया जानवर मन बर पानी के बौछार करे जात हे। संगेसंग जानवर मनके खाना-पानी म घलो मौसम के अनुसार बदलाव करे गेहे, जेखर ले उंखर सरीर म ठंडक बने रहे अउ इंखर स्वास्थ्य म असर न पड़े। ओमन ह बतईन मैत्री बाग चिड़ियाघर म अभी करीब तीन सौ चालीस वन्यप्राणी राखे गेहे।
